



Luuszäpfe 2010

Die Abwaggbrämie z'Dytschland, die isch nit glai:
De bringsch alte Schrott und griegsch baar duusig Stai.
Das miesst me bi uns au mol mache - kai Scherz
Villicht gäb's e Stutz fir dr Bundesroot Merz!

S ganz Roothuus isch dunggel- y froog mi wieso?
My Frind klärt mi uff, die wänn spaare esoo:
D'Liechshalter die het me komplett demontiert
Und nur no Bewegungsmälder installiert.

Jetz hänn d'Bärner Bääre, verzelt mir mi Schatz
E riisigs neys Gheeg griegt, deert hänn si scheen Blatz.
Als näggschts gits es Affehuus, das isch doch gwaltig:
Denn gniesst au dr Bundesroot artgrächti Haltig!

Dr Merz dä isch grangg, das hann ich letschhin gheert.
Schuld isch dr Gaddafi, ich bi ganz empeert.
Wäg iim het dr Merz d'Schweinegrippe jetz au
Kai Wunder dä macht ihn jo ständig zer Sau!

Noch der ganze Schweinegrippe-Hysterie
Het's z'vyyl Spritze umme - das merggt me denn gly.
Drumm macht me druss Zäpfli, au die solle schütze
Die ka au dr Minu ganz luschtvoll benütze.

Die Geothermie-Bohrig,s het's niemerts dänggt,
het doch ebbis brocht, wenn au numme beschränggt:
Me het drum im Bohrloch, im diefe, ganz unde
E baar warmi Brieder vo dr SVP gfunde.

Es het ain der Berlusconi attackiert
Drum wird si Gsicht wieder emol operiert.
Doch nutzt die Fassadesanierig e Drägg
Mit däm griegsch dr Schaade wo dä het nit wäg!

D'Stadtbildkommission findet, ych grieg e Wuet
Die Rettigsringkäschte, die gseet me vyl z'guet.
Mir finde, die spinne komplett, dä ganz Huffe
Sott me stadtbildkonform im Rhy lo versuffe!

Jetz kasch bim Dram faare di Fasnachtsgen teschte
Denn waisch nochhär grad - was isch fir mi ächt s'Beschte.
Und hesch gar kai Fasnachtsgen, macht das gar nyt,
Bim Comité schaffe jo numme so Lyt!

Ain vo Al Jazeera isch an d'Fasnacht koo,
und schribt ganz begaischteret hai: S'isch esoo,
Entsorget die Burkas, mir dien s'Imitsch drylle,
mit Goschdym und Larve kasch besser verhylle!



Wottsch au by uns bänggle?
Schigg doch aifach e Brief in unser Boschtfach
VSG Postfach 4365 4002 Basel
Oder goosch uff: www.vsg-basel.ch

Drugg: Discount Print H. Leidenfrost AG Basel